



## ХАЛЫҚТЫ АУЫЗСУМЕН ҚАМТАМАСЫЗ ЕТУ – БАСТЫ МАҚСАТ

Мемлекет басшысы Қасым-Жомарт Тоқаевтың төрағалығымен Қазақстан Республикасы Қауіпсіздік Кеңесінің отырысы өтті. Жиында экология және су қауіпсіздігі мәселелері қарастырылды.

Экология және табиғи ресурстар министрі Зүлфия Сүлейменова экологиялық қауіпсіздіктің жай-күйі жөнінде баяндама жасады. Сондай-ақ бірқатар мемлекеттік орган басшылары мен өңір әкімдері жекелеген мәселелер бойынша есеп берді.

Президент отырыс барысында экологиялық қауіпсіздікке қатер төндіретін табиғи және антропогендік факторларға қарсы күрес аса маңызды екенін атап өтті.

— Соңғы жылдары көптеген елдің үкіметтерінің белсенділігі артты. Экологияны жақсарту, «жасыл» экономикаға көшу және көмірсутегі бейтараптығына қол жеткізу үшін батыл шешімдер қабылданып жатыр. Ұрпағымыздың дені сау болып, ауасы таза елде өмір сүргіміз келсе және мемлекетімізді бүкіл әлем мойындағанын қаласақ, біз олардан үлгі алуымыз керек, — деді Қасым-Жомарт Тоқаев.

Мемлекет басшысы экология саласында шұғыл шешім қабылдауды қажет ететін проблемаларға баса назар аударды.

— Кеңес кезеңінен келе жатқан көптеген өндіріс орны, көмір жағатын электр станциялары мен қазандықтар экологиялық ахуалдың нашарлауына әкеп соқтырды, — деді Президент.

Бұдан бөлек, жиында қоршаған ортаны қорғауға үлкен жауапкершілікпен қарау жөнінде бірқатар мәселе көтерілді.

Президент облыстар мен республикалық маңызы бар қалалар басшыларының назарын рұқсат етілмеген жерлердегі коқыстарды жою және коқыс өңдеу көрсеткіштерінің төмен екеніне аударды.

Қасым-Жомарт Тоқаев күн тәртібіндегі мәселелерді қарастыру нәтижесінде Үкіметке ұлттық экологиялық стандарттарды әлемдік стандарттарға сәйкестендіру, өндіріс орындарының зиянды шығарындыларын азайту, қатты тұрмыстық қалдықтарды қайта өңдеу, рұқсат етілмеген жерлердегі коқыстарды жою және эрозияға ұшыраған жерлерді қайта қалпына келтіру жөнінде бірқатар тапсырма берді.

Қарағанды облысы Шет ауданындағы егістік алқаптарын қалпына келтіріп, мал шаруашылығын

дамытуға қатысты пилоттық жобаның жүзеге асырылу тәжірибесін еліміздің өзге өңірлерінде қолдану мақсатында жан-жақты зерттеуге тапсырма берілді.

Жиын барысында су қауіпсіздігі саласындағы қауіп-қатер деңгейінің артып келе жатқаны атап өтілді.

Мемлекет басшысы экономиканың барлық саласында, әсіресе агроөнеркәсіп кешенінде суды үнемді пайдалану және су шығынын азайту үшін жүйелі тәсілдер қажет екеніне тоқталды. Себебі тоғандардың және су ресурстары шығынының негізгі бөлігі осы ауыл шаруашылығы саласына тиесілі.

Су үнемдейтін технологияны енгізу және суды тиімді тұтынуды экономикалық тұрғыда ынталандыру шараларын дамытумен қатар, су шаруашылығы инфрақұрылымын, атап айтқанда, суды пайдалану мөлшерін есептеу, мониторинг жүргізу және болжам жасау ісін цифрландырудың өзектілігі артып келеді.

Қасым-Жомарт Тоқаев су шаруашылығы нысандары жұмысының тиімділігін және бөлінетін қаржыны жұмсаудың ашықтығы мен нәтижелілігін арттыру мәселелеріне ерекше назар аударды.

Президент Үкіметке экология мен су салаларындағы ғылыми және кадрлық әлеуетті күшейту үшін шаралар қабылдауды тапсырды. 2030 жылға дейін кезеңде су ресурстарын бағалау саласында мақсатты ғылыми-зерттеу жобалары жүзеге асырылады. Оның нәтижесі су саласын басқаруда ескеріледі.

Мемлекет басшысы күн тәртібіндегі екінші мәселені талқылау нәтижесінде сапалы ауызсудың қолжетімді болуы су қауіпсіздігінің басты көрсеткіші екенін атап өтті.

— Халықты ауызсумен қамтамасыз ету және су қорын келешек ұрпаққа сақтау үшін жан-жақты шаралар қабылдау — біздің тікелей міндетіміз, — деді Қасым-Жомарт Тоқаев.

Жиын соңында уәкілетті мемлекеттік органдарға ұлттық қауіпсіздіктің ең маңызды бағыты саналатын су қауіпсіздігін қамтамасыз ету жөнінде бірқатар тапсырма берілді.

### ЖЕР ДАУЫ АЗАЙМАЙ ТҰР



Жайылым жерінің жетіспеушілігі, субсидия алудағы қиындықтар, тексерістің көптігі, бал сатудағы түйткілдер — ауыл шаруашылығы тауарын өндірушілер кезігіп отырған мәселе аз емес. Солтүстікқазақстандық кәсіпкерлер мемлекеттік органдардан осы мәселелерді шешіп беруін сұрайды.

### ЧЕМПИОНДАР ЕЛГЕ ОРАЛДЫ



Кеше Астанада Нұрсұлтан Назарбаев халықаралық әуежайына Қазақстан ұлттық құрамасының боксшылары Өзбекстаннан ұшып келді. Әлем біріншілігінің жеңімпаздары мен жүлдегерлерін Мәдениет және спорт министрі Асхат Оралов, БАҚ өкілдері және жанкүйерлері ыстық ықыласпен қарсы алды.



### ТЕЛЕФОН АРҚЫЛЫ СӨЙЛЕСТІ

Қасым-Жомарт Тоқаев Түркия Президенті Режеп Тайип Ердоғанмен телефон арқылы сөйлесті.

Әнгімелесу барысында Мемлекет басшысы Қасым-Жомарт Тоқаев Режеп Тайип Ердоғанды Түркиядағы президент сайлауының бірінші кезеңінде жеңіске жетуімен құттықтады.

Президент сондай-ақ парламенттік сайлауда Әділет және даму партиясы бастаған



республикалық альянстың жеткен жетістігін атап өтті.

Сонымен қатар Қазақстан мен Түркия президент-

тері бауырлас екі ел арасындағы көпжақты ынтымақтастықты одан әрі тереңдету мәселелерін талқылады.



### ЖАРЛЫҚ

А.Ж. Құрманбекөвті III дәрежелі «Айбын» орденімен наградтау туралы

#### ҚАУЛЫ ЕТЕМІН:

1. Қызметтік борышын атқаруда көрсеткен батылдығы мен жанқиярлығы үшін Төтенше жағдайлар министрлігінің Алматы қаласы Төтенше жағдайлар департаменті өрт сөндіру және авариялық-құтқару жұмыстары қызметі

№ 7 өрт сөндіру бөлімінің аға өрт сөндіруші-құтқарушысы Арслан Жолдасбекұлы Құрманбекөв III дәрежелі «Айбын» орденімен наградталсын (марқұм).

2. Осы Жарлық қол қойылған күнінен бастап қолданысқа енгізіледі.

Қазақстан Республикасының  
Президенті

Қ.ТОҚАЕВ

## СИАНЬ САПАРЫ СЕРІКТЕСТІККЕ СЕРПІН СЫЙЛАЙДЫ

Жаһанда экономикалық, әскери және саяси қос супергигант бар. Әлемдік архитектоникадағы іргелі өзгерістер де соларға байланысты. Әңгіме әрине, АҚШ пен Қытай жайында. Бүгінде Шың елі дүниежүзілік саясаттағы орнын бекемдеп жатыр. ҚХР бейбіт дамуға оралуы үшін Киев пен Мәскеуді бітістіруге білек сыбана кірісті. Бейжің сондай-ақ Ауғанстанды «Белдеу мен жол» бастамасына қосу жөнінде төліптермен келісті. Қазақстан болса, Батыс пен Шығыстың қос алыбымен ынтымақтастығын өрістетудің үстінде.

Бұл ретте Қазақстан Президенті Қ.Тоқаевтың 17-19 мамырдағы Қытай Халық Республикасына мемлекеттік сапары және «Орталық Азия + Қытай» (C+C5) саммитіне қатысуы халықаралық қоғамдастықтың үлкен қызығушылығын туғызып отыр. Себебі сарапшылардың байламынша, Астана бүкіл аймақтың көшбасшысы саналады, ал оның Президенті Қ.Тоқаев Орталық Азиядағы геосаясат пен геоэкономиканың тренд-үрдістерін қалыптастырады.

Басқаны айтпағанның өзінде, егер Қазақстан басшылығының табанының бүрі болмай, тайғанақтай жөнелгенде, яғни Беларусь сияқты ТМД кеңістігіндегі ең ірі соғыста Ресейдің ығына жығылып, дегеніне көніп, қаруымен көмектескенде, еліміз алапат санкциялардың астында қалатын еді. Мұның зардабын бүкіл Орталық Азия (ОА), тіпті Қытай тартатын еді. Себебі КХР-дың әлеммен тауар айналымының үлкен бөлігі Қазақстан арқылы өтеді.

(Жалғасы 4-бетте)

## ҚАЗАҚ ОСЫ — ҚАРАСЫҢ БА, АҚСЫҢ БА...

Еліміздің этносаралық қатынас саясатында Қадыр Мырза Әлі ағамыздың «Қазақ осы — қарасың ба, ақсың ба, қоңырсың ба, жатырқауды білмейтін» деген өлең жолдары расқа айналатын түрі бар. Өйткені таяуда өткен Қазақстан халқы Ассамблеясының сессиясынан кейін өзге ұлт өкілдерінің төлқұжатындағы «ұлты» деген жеріне «қазақ» деп жазу керек деген ұсыныс қайта қозғалды.

5 >>















